

BN Negeri Utamakan Tunai Manifesto Penuhi Keperluan Pengundi - Mukhriz Bernama
30 Sept, 2013

ALOR SETAR, 30 Sept (Bernama) -- Menteri Besar Datuk Mukhriz Tun Dr Mahathir berkata Barisan Nasional (BN) negeri kini memberi keutamaan kepada manifesto pilihan raya umum lepas sebagai memenuhi janji kepada rakyat yang memberi sokongan terhadap BN.

"Hakikatnya dah tentu nak jaga orang yang sokong kita (dahulu)...," katanya kepada pemberita selepas mempengerusikan mesyuarat khas Badan Perhubungan Umno Kedah bagi membincangkan persiapan menghadapi pilihan raya kecil DUN Sungai Limau di sini, Ahad malam.

Mukhriz berkata pendirian beliau tetap sama sebagaimana yang pernah beliau katakan dalam sidang Dewan Undangan Negeri bahawa BN akan tunaikan dahulu manifesto pilihan rayanya maka keutamaan diberikan untuk membangunkan kawasan Parlimen dan DUN yang dimenangi BN.

Ini tidak bermaksud untuk membalas dendam, sama seperti yang dilakukan di Pulau Pinang juga, malah kerajaan negeri (Pulau Pinang) tidak mempedulikan pun kawasan yang dikuasai BN, katanya.

Menteri Besar diminta mengulas saranan wakil-wakil rakyat pembangkang di Kedah supaya kerajaan negeri turut melaksanakan manifesto mereka (di kawasan pembangkang) untuk kepentingan rakyat.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=981604>